

Pusat Komuniti Kebun-Kebun Bangsar

# Pengerusi kelab minta kerja berkebun dibenarkan

Lesen Pendudukan Sementara dimohon semula kepada PTG Wilayah Persekutuan

Oleh Suzalina Halid dan Awatif Hasani  
bhnews@bh.com.my

**Kuala Lumpur:** Pusat Komuniti Kebun-Kebun Bangsar akan memohon semula Lesen Pendudukan Sementara bagi maksud nurseri kepada Pejabat Pengarah Tanah dan Galian (PTG) Wilayah Persekutuan.

Pengerusi Kelab Kebun Bandar, Ng Sek San, berkata pihaknya mahu kerja komuniti yang dilakukan di kawasan tanah milik kerajaan itu sah, berikutan ia dilaksanakan bagi tujuan penjagaan ekosistem, kepelbagaian bio dan pendidikan kepada anak muda.

“Kita ada memohon Lesen Pendudukan Sementara pada 2020, namun tidak diluluskan, tiga bulan lalu.

“Kita akan membuat permohonan semula dan kita mahu be-



Pusat Komuniti Kebun-Kebun Bangsar dibangunkan di kawasan seluas kira-kira 3.2 hektar membabitkan pelbagai tanaman. (Foto Rohanis Shukri/BH)

kerjasama dengan pihak berkuasa supaya dibenarkan untuk terus melakukan kerja kebun di sini kerana kita bukan mencuri,” katanya kepada BH, di sini.

Sebelum ini, tular di laman sosial berhubung notis pemberitahuan mengosongkan tapak di Lorong Bukit Pantai 4, di Bangsar yang dibangunkan projek pertanian.

Susulan itu, Pengarah PTG Wilayah Persekutuan, Datuk Muhammad Yasir menjelaskan berlaku pelanggaran syarat Lesen Pendudukan Sementara (TOL)

bagi maksud nurseri di kebun berkenaan sehingga menyebabkan notis pengosongan terpaksa dikeluarkan.

Sek San berkata, projek komuniti itu dibangunkan di kawasan seluas kira-kira 3.2 hektar membabitkan tanaman pelbagai jenis buah-buahan dan sayur-sayuran antaranya betik, pisang, kubis, cili, bendi dan terung.

Beliau berkata, kawasan yang menempatkan kira-kira 30 pelbagai jenis spesies haiwan dan serangga itu juga dilaksanakan bukan bagi maksud keuntungan,

tetapi bagi tujuan pendidikan, membina ekosistem dan membantu masyarakat miskin.

“Setiap minggu kita dapat menghasilkan 20 kilogram sayuran yang diagihkan kepada orang miskin dan pelarian.

“Kita turut mempunyai hingga 500 ahli sukarela termasuk 40 yang aktif dalam mengendalikan projek terabit,” katanya.

Beliau berkata, pihaknya juga hairan berikutan antara alasan pengosongan dibuat kerana aduan daripada penduduk sedangkan projek itu mendapat soko-

“Kita akan membuat permohonan semula dan kita mahu bekerjasama dengan pihak berkuasa supaya dibenarkan untuk terus melakukan kerja kebun di sini kerana kita bukan mencuri”

Ng Sek San,  
Pengerusi  
Kelab Kebun  
Bandar



ngan daripada kejiranan.

Katanya, ekoran notis pengosongan itu mereka terpaksa memberhentikan sementara kerja yang biasa dilakukan.

Sementara itu, Sek San berkata, pihaknya akan terus menjalankan kebun komuniti itu walaupun notis pengusiran sudah dikeluarkan PTG Wilayah Persekutuan yang membolehkan mereka dipenjarakan atau didenda sehingga RM500,000 jika mengingkari arahan.

Beliau berkata, aktiviti kebun berjalan seperti biasa sehinggalah pihak berkuasa datang membuat pengusiran di kebun itu.

“Saya tidak menyedari lesen TOL yang diberikan kepada kebun terbabit pada 2016 luput pada 2018.

“Saya juga menafikan kami ada membina struktur haram seperti didakwa DBKL dalam notis dihantar, malah setiap dua bulan mereka datang memeriksa kami di kebun dan melihat sendiri aktiviti di sini,” katanya.